

四庫全書薈要

• 乾隆御覽本

經部

欽定四庫全書薈要

經部

禹貢指南卷三

四

詳校官祭酒臣韋謙恒



禹貢指南卷三

宋 毛晃 撰

導山 岍及岐至于荆山逾于河壺口雷首至于太岳底柱
析城至于王屋太行恒山至于碣石入于海

導山 岍山 在右扶風即吳嶽也 周禮大司樂

注五嶽岱在兗州衡在荊州嵩在豫州華在雍州恒
在并州 正義曰周處鎬京在五嶽外故鄭康成注

康誥云岐鎬處五嶽之外周公為其道里不均故東
營洛邑合諸侯謀作天子之居是西都無西嶽權立
吳嶽為西嶽 廣雅河西曰嶽頂有五峰 周禮職
方氏雍州其山鎮曰嶽山注嶽吳嶽也 漢地理志
吳嶽在汧縣西古文謂之汧山秦都咸陽山曰西嶽
岐山 解在雍州

荆山 解在雍州

壺口山 水經壺口山在河東北屈縣東南 馮衍

顯志賦瞰太行之嵯峨兮觀壺口之崢嶸注太行山
在上黨南壺口山在上黨東九域志今潞州有上
黨河

雷首山 水經雷首山在河東蒲坂縣東南南有歷
山舜所耕處又曰伯夷叔齊隱于首陽山馬融曰在
蒲坂華山之北河曲之中揚雄河東賦曰登歷觀而
遠望兮聊浮游于河之巖注雷首西枕大河九域
志雷首山今在陝州陝音閃中从兩入與陝字不同

陝音狎中从兩人 郭緣生述征記云華山與首陽
本同一山河神巨靈擘開以通河流 九域志今河
中府有巨靈祠有夷齊廟或謂首陽即雷首未詳
太岳山 水經太岳山在河東永安縣山即冀州岳
陽也 周禮職方氏冀州山鎮曰霍山即霍太山也
亦曰太岳

底柱山 水經底柱山在河東太陽縣東河中顏
師古曰在陝縣東北山在河中形若柱也

析城山 水經析城山在河東濩澤縣西南

王屋山 水經王屋山在河東垣曲縣東北昔黃帝受丹訣于是山所謂河東者西河之東也底柱山在東河中又東至于底柱是也

太行山 水經太行山在河內野王縣西北注太行山一名歸山王烈得石髓處也 馮衍傳注太行山在上黨南 九域志今河東路龍德府潞州有上黨縣河北西路懷州有太行山河東路澤州亦有太行

山顏師古曰在河內山陽西北

恒山 水經恒山為北嶽在中山郡上曲陽縣西北

碣石山 解在冀州 顏師古注漢地理志曰太行

恒山二山連延東北接碣石而入于海與孔氏書傳

同 漢武帝元封元年行自泰山東巡海上至碣石

文穎曰碣石在遼西紫縣縣今罷屬臨榆此石著海

旁顏師古曰碣者碣然特立之貌也 經言夾右碣

石鄭康成以為禹由碣石山西北行盡冀州之境還

從山東南行入河 正義云鄭以北行則東為右南
行西為右故夾山兩旁山常居右與孔傳異

三條四列 按尚書正義導岍至敷淺原舊說以為
三條地理志云禹貢北條荆山在馮翊懷德縣南南
條荆山在南郡臨沮縣東北此是舊有三條之說馬
融王肅皆以為三條導岍為北條西傾為中條嶓冢
為南條鄭康成以為四列謂導岍為正陰列西傾為
次陰列嶓冢為次陽列岍山為正陽列其首尾延連

相及孔氏之意亦必與馬鄭同

西傾朱圉鳥鼠至于太華熊耳外方桐柏至于陪尾

西傾山 解在梁州

朱圉山 水經朱圉山在天水北冀縣南山有石鼓

開山圖謂之天鼓山 顏師古曰朱圉山在漢陽冀

縣南

鳥鼠山 解在雍州

太華山 在京兆華陰縣南 山海經曰太華之山

削成而四方其高五千仞其廣十里鳥獸莫居有蛇
焉名曰肥遺方足四翼見則天下大旱武王放馬牛
于桃林墟孔安國曰在華山東屬漢弘農郡華陰縣
書疏華山四州之際東北冀東南豫西南梁西北
雍十字分之四隅為四州一名太華 水經注引國
語云華岳本一山當河河水過而曲行河神巨靈手
盪脚蹋開而為兩今掌足之跡仍存華巖開山圖曰
有巨靈者偏得神元之道能造山川出河所謂巨靈

三
顛顛首戴靈山者也 顏師古曰太華即今華陽山
九域志華州潼關即桃林之塞也

熊耳山 在弘農盧氏縣東 水經注熊耳山一名
蔓渠 山海經曰其上多漆其下多棧餘豪之水出
焉西北流注于洛洛水之北有熊耳山雙巒競舉狀
同熊耳注曰此自別山不與禹貢導洛自熊耳同也
昔漢光武破赤眉樊崇積甲仗與熊耳山平即是南
安縣有熊耳峽 顏師古曰在陝東

外方山 即嵩高山也在潁川 水經外方山崧高
是也 鄭康成毛詩譜云外方之山即嵩高也山海
經謂為大室之山左傳司馬侯言大室杜預曰在河
南陽城縣西南 孟子益避禹之子于箕山之陰注
云嵩高之北 漢地理志室高縣屬潁川郡武帝置
以奉大室山是為中岳有大室中室山廟古文以為
外方山室古崇字顏師古曰外方在潁川故縣即崇
高也

桐柏山 水經桐柏山在南陽平氏縣東南

陪尾山 水經陪尾山在江夏安陸縣東北 泗水

注魯國卞縣東南陶虛西阜泗水出焉博物志曰泗

出陪尾即斯阜也此自是魯國泗水之所出俗呼媽

亭山偶名陪尾非安陸之陪尾山也 漢地理志安

陸縣橫尾山在東北古文以為倍尾山倍讀曰陪顏

師古曰熊耳外方桐柏陪尾四山相連也 晉地理

志江夏郡安陸縣橫尾山在東北古之陪尾山

導嶓冢至于荆山內方至于大別

嶓冢山 解在梁州 水經穀水出弘農黽池縣南

嶓冢林穀陽谷注山海經曰傳山之西有林焉曰嶓
冢穀水出焉東流注于洛今穀水出于嶓東馬頭山
穀陽谷東北流歷黽池川漢景帝三年初徙萬戶為
因嶓黽之池以目縣焉此非漾水所出之嶓冢山乃
嶓冢林耳嶓冢山在隴西詳在導川漾水

荆山 此梁州荆山在梁荆二州之間故晉志謂荆

州取名于荆山 水經荆山在南郡臨沮縣東北注

南條山也卞和得璞玉于是山楚王不理懷玉哭于

其下後玉人理之所謂和氏之璧 荊州記曰西北

三十里有清谿谿即荆山首曰景山卽卞和泣玉處

南郡賦曰漢水至荆山東別流為滄浪之水

內方山 水經內方山在江夏竟陵縣東北 漢地

理志竟陵縣章山在東北古文以為內方山

大別山 水經大別山在廬江安豐縣西南漢水觸

大別山而南入于江 左傳定公四年吳伐楚楚子
常濟漢而陳自小別至于大別二別皆在漢上杜預
曰禹貢漢水至大別南入江然則此二別在江夏界
水經注曰巴水出雩婁縣之下靈山即大別山也
與決水同出一山故世謂之分水山亦或曰巴山

京相璠春秋土地名曰大別漢東山名也在安豐縣
南杜預釋地曰二別近漢之名無緣乃在安豐案地
說言漢水東行觸大別之陂南與江合則與禹貢相

符矣

岷山之陽至于衡山過九江至于敷淺原

岷山 解在梁州 漢地理志作嶠郊祀志云瀆山

蜀之岷山也秦漢時又謂之瀆山始皇常令祠官奉祠 王羲之與謝安書曰蜀中山川如岷山夏含霜雪攷之前聞崑崙之中也 九域志成都府路茂州有岷山

衡山 水經衡山在長沙湘南縣東南注禹治洪水

至此祭衡山于是得金簡玉字之書案省玉字得通
水理也 顏師古曰岷山江所出衡山江所經

敷淺原 水經敷淺山地 在豫章歷陵縣西南有傳

陽山即敷淺原 漢志敷淺原一名傳易山在豫章

郡歷陵縣傳易川在南顏師古曰傳讀曰敷易古陽

字 今觀所謂傳易山甚庠小恐非經所記者或謂

衡山東至廬阜極于大江彭蠡之交而止疑此為敷

淺原白居易以為江入海處為敷淺原則丹陽京口

之間殆非也

導弱水至于合黎餘波入于流沙

導川 弱水 弱水西至酒泉合黎張掖郡居延縣

東北有居延澤即流沙河也 水經合離山在酒泉

會水縣東北注云即合黎山也 後漢張掖居延屬

前漢張掖郡居延縣居延國有居延澤古流沙獻帝

建安末立為西海郡澤在東北古文以為流沙王莽

改曰居成 漠地理志合黎作合藜顏師古曰流沙

在燉煌西 孔氏傳合黎水名顧氏謂水與山合因
山為名

導河積石至于龍門南至于華陰東至于砥柱又東至
于孟津東過洛汭至于大伾北過泝水至于大陸又北
播為九河同為逆河入于海

河水 水經崑崙墟在西北去嵩高五萬里地之中
也河水出其東北陬屈從其東南流入于渤海又出
海外南至積石山下有石門河水冒以西南流 山

海經崑崙墟在西北河水出其東北隅 爾雅河出

崑崙墟色白所渠并千七百一川色黃百里一小曲

千里一曲一直 物理論曰河色黃者衆川之流蓋

濁之也 酈道元注水經引山海經曰河水出渤海

又海水西北入禹所導積石山山在隴西郡河關縣

西南羌中余攷羣書咸言河出崑崙重源潛發淪于

蒲昌出于海水故洛書曰河自崑崙出于重野謂此

矣逕積石而為中國河故成公綏大河賦曰覽百川

之洪壯莫尚美于黃河潛崑崙之峻極出積石之嵯

峨釋氏西域傳曰河自蒲昌潛行地下南出積石郭

璞云積石山今在金城河門關西南羌中河水行塞

外東入塞內

案原本此四句誤作水經在張掖郡南句下今攷水經及山海經注移正水

經又云河又東入塞過敦煌酒泉張掖郡南注云河

自蒲昌有隱淪之證並間關入塞之始重源發于西

塞之外出于積石之山禹貢所謂導河自積石也山

在西羌之中燒當所居也後漢桓帝延熹二年西羌

燒當犯塞護羌校尉段熲討之追出塞至積石山斬首而還司馬彪曰西羌者自析支以西濱于河首在右居也河水屈而東北流逕于析支之地是為河曲矣應邵曰禹貢析支屬雍州在河關之西東去河關千餘里羌人所居謂之河曲羌也東北逕歷敦煌酒泉張掖南案諸書皆言河自崑崙然班固漢書叙張騫奉使西域歷諸國烏覩所謂崑崙蘇氏謂騫徒見蔥嶺于闐二水便謂之河不知河在西南羌中吐

蕃自言崑崙在國西南河之所出也

龍門 水經河水又南過河東北屈縣西注云屈縣
故城西十里有風山西四十里河南有孟門山淮南
子曰龍門未闢呂梁未鑿河出孟門之上大溢逆流
無有丘陵高阜滅之名曰洪水大禹疏通謂之孟門
穆天子傳曰北登孟門九河之嶺孟門即龍門之上
口也實謂黃河之巨阨兼孟津之名矣此石經始禹
鑿河中漱廣夾岸崇深傾崖返捍巨石臨危若墜復

倚古之人有言水非石鑿而能入石信哉 水經河

水又南得鯉魚注歷澗東入窮溪首便其源也爾雅
曰鱣鮪也出鰲穴三月則上渡龍門得渡為龍否則
點額而還 魏土地記曰梁山北有龍門山大禹所
鑿通孟津河口廣八十步巖際鐫跡遺功尚存岸上
並有廟祠 司馬遷傳遷生龍門顏師古曰龍門山
其東則在今秦州龍門縣北其西則在今同州韓城
縣北而河從其中下流馮衍傳注龍門河所經今絳

州縣也案龍門山有二名隋煬帝營宮洛陽登却山望伊闕曰此豈非龍門邪因謂之龍門非禹貢之龍門也伊闕龍門其下有灘名八節灘白居易所開九域志今河中府龍門縣有龍門山書云導河至龍門是也

華陰水經河水又南至華陰潼關渭水從西來注之注云河在關內撞激關山謂之潼關又云關山在扶風汧縣之西注云河水自潼關東北流側有長

坂謂之黃卷坂傍絕澗陟此坂以升潼關所謂沂黃
卷以濟潼關也歷北出東峭通謂之函谷關遂岸天
高空谷幽深澗道之峽車不方軌號曰天險故西京
賦曰巖險周固襟帶易守所謂秦得百二并吞諸侯
也

砥柱 水經河水又東過砥柱間注云砥柱山名也
昔禹治洪水山陵當水者鑿之故破山以通河河水
分流包山而過山見水中若柱然故曰砥柱也三穿

既決水流疏分指狀表目亦謂之三門矣山在虢城
東北太陽縣城東也 顏師古曰砥柱在陝縣東北
山在河中形若柱也

孟津 水經河水又東逕平縣故城北酈注云河南
有鈎陳壘世傳武王伐紂八百諸侯所會處尚書所
謂不期同時也紫微有鈎陳之宿主鬪訟兵陣故遁
甲攻取之法以所攻神與鈎陳并氣下制所臨之辰
則秩禽敵是以壘資其名河水于斯有盟津之目論

衡曰武王伐紂升舟陽侯波起疾風逆流武王操黃
鉞而麾之風波畢除中流白魚入于舟饋以告天與
八百諸侯咸同此盟故曰孟津亦曰盟津又曰富平
津杜預建浮橋于此

案原本此句在孔穎達正義之後今從水經注移入所謂

造舟為梁又謂之陶河昔禹治洪水觀于河見白面
長人魚身出曰吾河精也授禹河圖而還于淵及周
王子朝篡位與敬王戰乃取周之寶玉沈河以祈福
後二日津人得之河上將賣之則變而為石及敬王

位定得王者獻之復為玉也 顏師古曰孟津在洛

陽之北都道所湊故號孟津孟長大也漢地理志作
盟音同孔安國曰孟地名在洛北都道所湊古今以
為津俗謂之治戍津今河陽縣津也 孔穎達曰孟
地名津是所渡處水河流至此其勢稍緩可以橫舟
而渡武王伐商渡師于此後世謂之武濟水

洛汭 水經河水又東沛水入焉洛水從縣西北流
注之注云洛水于鞏縣而東洛汭北對琅邪渚入于

河謂之洛口自縣西來而北流注洛清濁異流皦焉殊別應瑒靈河賦曰資靈川之遐源出崑崙之神邱涉津洛之峻泉播九道于中州山海經曰洛水成臯西入河是也謂之洛汭即什谷也故張儀說秦曰下兵三川塞什谷之口謂此水也史記音義曰鞏縣有鄆谷水河至孟津又東行及鞏縣東洛自西南來入之河自洛北過之故曰東過洛汭

大伾水經河水又東過成臯縣北濟水從北來注

之又東逕成臯大伾山下 爾雅釋山曰山一成伾

許叔重吕忱並以為一成也孔安國以為再成曰伾亦或以為地名鄭康成曰地喉也沆出伾際然則大伾在河內脩武武德之界濟沆之水與滎播澤出入自此然則大伾即是山矣伾北即經所謂濟水從北來注之者也伾備悲反爾雅作坯音同在今通利軍顏師古注地理志山再重曰伾音平鄙反張晏曰成臯縣山是也薛瓚以為今脩武武德無此山也成

卷三
臯縣山又不一成也今黎陽山臨河豈是乎師古以
為在成臯溝洫志注同

澤水 水經河水又東北逕元城縣故城西北而至
沙丘堰注云元城縣北有沙丘堰者不遵其道曰降
亦曰潰堰障水即降水也顏師古以為在信都 澤
水一名濁漳水水經濁漳水出上黨長子縣西發鳩
之山漳水出焉東過其縣南屈從其縣東北流注又
東過壺關縣北又東北過屯留縣潞縣北注閭駟曰

潞縣有潞水為冀州浸即漳水也世人謂濁漳為潞水又東過武安縣又東出山過鄴縣西又東過列人縣南又東北過斥漳縣南又東北過曲周縣東又東北過鉅鹿縣東又北過堂陽縣西又東北過扶柳縣北又東北過信都縣西又東北過下博縣西又東北過阜城縣北又東北至昌亭與寧池河會酈道元注云漳水又東北逕武邑縣郭南又東逕武強縣北又東逕武隧縣故城南白馬河注之水上承寧池東逕

樂昌縣北饒陽縣南又東南逕武邑縣北而東入衡
水謂之交津口又云衡漳又東逕武邑縣故城北又
東北右合張平口故溝上承武強淵又逕東昌縣故
城北又東北左會潯池故瀆謂之合口又東北分為
二川當其水決處名之曰李聰渙又東北至樂成陵
縣別出北又東北過成平縣南又東北過章武縣西
又東北過平舒縣南東入海 案漳水與荊州漳水
不同左傳江漢沮漳楚之望也此荊州之漳非冀州

之漳也又洛州又有衡漳則此水之所經也

大陸 在鉅鹿縣北解在冀州 水經沙丘堰至于大陸北播為九河注云風俗通河播也播為九河自此始

九河逆河 鄭康成曰九河下尾合曰逆河言相承受也蓋所洄下之勢以通河海及齊威霸世塞廣田居同為一河故自堰以北館陶貝丘鬲盤廣川信都東光河間樂成以東城地並存川瀆多亡漢世河決

金堤南北離其害議者常欲求九河故迹而川之未
知其所以班固云自茲距漢北亡八枝者也 漢
地理志顏師古曰播布也同合也九河又合而為一
名為逆河言相迎受也海即渤海也 溝洫志河災
之羨溢害中國也尤甚唯是為務故導河自積石歷
龍門南到華陰東下底柱孟津碓汭至于大伾于是
禹以為河所從來者高水湍悍難以行平地數為敗
迺醜二渠以引其河北載之高地過降水至于大陸

播為九河同為逆河入于渤海孟康曰禹釀二渠其一
一出貝丘西南南折者也其一則漯川也河自王莽
時遂空唯用漯耳薛瓚以為禹貢夾右碣石入于河
則河入海乃在碣石也武帝元光二年河移徙東郡
更注渤海禹時不注也 漢武帝元光二年河徙東
郡更注渤海司空掾王橫言曰往昔天嘗連北風海
水溢西南出浸數百里故張揖云碣在海中蓋淪于
海水也昔燕齊遼曠分置營州今城屆海濱海水北

浸城垂淪半王橫之言信而有徵 說者謂九河之

名初無意義孫炎郭璞李巡從而為之說率多附會
孔穎達謂經言九河既道謂復其故道則名應先有
不是因禹立名如徒駭太史之說也曾氏以為簡絜
乃一枝河之名共為八枝其一不名者河之經流也
先儒不知經流不名乃分簡絜為二以足九數豈有
七皆複名而簡絜乃單名乎漢許商則以徒駭為本
道其八為支流林少穎以為播為九河支派並列其

勢則均豈一為經流八為支派哉許商上言于成帝
時謂徒駭在北鬲津在南其間相去三百餘里今徒
駭胡蘓鬲津在成平東光鬲縣界中孔穎達謂商言
三河在三縣界則徒駭在成平胡蘇在東光鬲津在
鬲縣既分三河之處則太史馬頰覆鬴三者
在東光之北成平之南簡絜鈎盤在東光之南
鬲縣之北可知
皇朝太宗時參知政事張洎上奏曰昔大禹鑿
河自積石至于大伾即今成臯縣也或云黎陽山也

禹以大河流泛中國為害最甚乃于頌丘郡疏二渠以分水勢一渠自武陽縣東引入漯水其東北流至千乘縣入海即今黃河是也一渠疏畎引傍西山以東北勢高壤敞東水勢不使流鑿夾右碣石入于渤海書所謂北過降水至于大陸降水即濁漳大陸則邢州鉅鹿也播為九河同為逆河者河自魏郡貴鄉縣分為九道下至滄州合為一河言逆河者謂與海水反覆相承受也齊威公之霸也塞以廣田居惟一

河存焉今貝冀東界王莽枯河是也洎言詳實唯以
碣石海為今渤海誤耳九河雖無異名然其地亦

多同異漢志滹沱河民曰徒駭則非載籍所著蓋滹
沱源流別是一水與禹河不相干滹沱出鎮州逕深
定二州之間過瀛霸至莫州入海非與禹河同道也
樂史寰宇記徒駭在清池縣南鬲津在樂陵縣西東
北流入饒安縣南入海胡蘓在饒安無棣臨津三縣
臨津即漢之東光馬頰在樂陵縣東南輿地記所謂

篤馬河是也一曰在滴河縣北一曰在薊縣鉤盤在樂陵縣東南一曰在陽信縣北元和志昂津在安德將陵縣南馬頰在安德平原縣南杜佑通典馬頰覆鬴同在安德縣說者以為碣石在平州正南滄州東北而王橫張揖酈道元則以為九河已在海中諸說離析如此至若導河積石本無異說而元和志乃有大積石小積石兩山在其西南羌中首受于闐河派而為之源者為大積石吐谷渾又有柏海河源李道

宗自其王庭行空荒二千餘里至柏海僅得遠望積
石覽河源而還小積石在河鄯之間玉門陽關之內
或謂禹迹不應如是之近當以大積石為導河之始
且百川之大無如江河江之所導不過岷山未嘗遠
入西域河源乃深跨羌戎絕迹之地況經言導河積
石至于龍門積石雖在金城之西龍門乃近華陰中
間經涉靈夏綏銀以北一二千里皆所不敘聖人行
所無事大抵如此說者乃夸說曠邈以為廣大而不

知其流于荒誕不經也然九河之說地雖不同而名猶不異至若九江則名亦不一張須元所記已異于張僧監尋陽記而賈耽又謂江有八洲與江為九如曰沙曰人曰九江曰葛曰象曰烏曰感曰蚌又與二張不同且既曰八洲與江為九而八洲之中其一又自名九江其不經可知矣況經史皆言水中可居曰洲今謂江有八洲則是江中之洲渚爾安得稱九江乎樂史寰宇記李宗諤九江圖皆本于尋陽記唯鄭

康成以為九江乃廬江尋陽山溪九小水入江者孔
穎達主其說抑不思秦置九江郡漢初以為淮南郡
武帝復為九江其治在淮水之南與壽春對境未嘗
近江至王莽名豫章為九江則江西淮西皆在境內
隋人名尋陽為九江水北為陽尋亦作潯則在尋水
之北非江之北也尋水在江北郡又在尋北則近淮
矣或以為九江郡在江北近蘄州界者誤也又以為
潯亦江之一名者亦誤也其後以武昌柴桑縣與江

北同為九江郡既又移治江南為江州因號尋陽實
非本地白樂天為江州司馬作琵琶行直以今江州
之江為尋陽江頭其誤尤甚說者引司馬遷登廬山
以望九江遂以為九江近廬山然則齊威公登跨河
龍門山以望江漢豈亦近之耶大抵登高望遠苟非
有大山障蔽雖數千里盡在目中共柴桑本屬武昌
去洞庭九江不甚遠宜可望也南北大川支派可疑
者唯九河九江故併論之

禹貢指南卷三

禹貢指南卷四

宋 毛晃 撰

嶓冢導漾東流為漢又東為滄浪之水過三澨至于大別南入于江東匯澤為彭蠡東為北江入于海

漾水 解在梁州 水經漾水出隴西氐道縣嶓冢

山東至武都沮縣為漢水注云華陽國記曰漢水有二源東源出武都氐道縣漾山為漾水禹貢導漾東

流為漢是也西源出隴西嶓冢山會泉逕葭萌入漢
始源曰沔案沔水出東狼谷逕沮縣入漢漢中記曰
嶓冢以東水皆東流嶓冢以西水皆西流即其地勢
源流所歸故俗以嶓冢為分水嶺即此推之沔無西
入之理劉澄之云有水從沔陽縣南至梓潼漢壽入
大穴暗通罝山郭璞亦言是矣罝山穴小本不容水
水成大澤而流與漢合 漢地理志注師古曰漾水
出隴西氐道東流過武關山南為漢禹治漾水自嶓

冢始

漢水 滄浪之水 水經注曰武當縣西北四十里

漢水中有洲名滄浪洲庾仲雍漢記謂之千齡洲非
也是世俗訛音與字變也地說曰水出荆山東南流
為滄浪之水是近楚都故漁父歌曰滄浪之水清兮
可以濯我纓滄浪之水濁兮可以濯我足又云余案
禹貢言導漾水東流為漢又東為滄浪之水不言過
而言為者明非他水決入也蓋漢沔水自下有滄浪

通稱耳地連紀郢咸楚都也武當今均州

三澁 沔水東行過三澁流觸大別山馬融鄭康成
王肅孔安國等咸以為三澁水名也許叔重云水邊
上人所止也在江夏竟陵縣竟陵今復州玉沙縣是
也一說竟陵有滲滲水即三澁水也

彭蠡 今南康軍湖 孔安國曰匯澤也鄭康成曰
匯回也漢與江鬪轉東成其澤矣 顏師古曰匯迴
也又東迴而為彭蠡澤也 經言漢江東匯澤為彭

蠡岷江東迤北會于匯則是彭蠡在岷江之東北今
諸家多以江州湖口之湖為彭蠡乃在岷江之南未
詳其實然今所謂彭蠡澤自江州湖口縣南跨南康
饒州之境以接于隆興府之北其源東自饒徽信州
建昌南自章貢南安西自袁瑞以至分寧方數千里
之水皆會焉北過南康揚瀾左蠡遂東北流以趨湖
口而入于江 山海經廬江山三天子都
都一作鄣入江
彭澤西郭璞注云彭澤今彭蠡也在鄱陽彭澤縣漢

地理志廬江出陵陽東北入江陵陽者丹陽屬縣今宣城旌德有陵陽山而三天子都在徽饒之境廬江出其東南而西北流會于彭蠡而入江又云彭蠡澤在豫章彭蠡縣西水入湖漢者八謂鄱陽鄱水餘干餘水艾脩水塗淦水南城盱水建成蜀水宜春南水南楚彭水入大江者一賴豫章水湖漢即彭蠡出雩都自雩都東至彭澤縣入江所謂三天子都者蓋古三苗國也其水自彭澤西入江是其地在彭蠡西洞

庭東自南面北言之則洞庭在其左彭蠡在其右所謂左洞庭右彭蠡負固不服自稱天子故其民呼為三天子都也

北江 水經北江在毗陵北界東入于海又曰沔水與江合流又東過彭蠡澤又東出居巢縣南又東過牛渚縣南又東至石城縣分為二其一東北流其一又過毗陵縣北為北江

岷山導江東別為沱又東至于澧過九江至于東陵東

迤北會于滙東為中江入于海

江水 解在荊州

岷山 解在梁州

沱水 解在荊州 顏師古曰別而出也江東南流

沱東行 案地理志南郡枝江縣江沱在西北荊州

之沱也蜀郡郫縣江沱在西北此梁州之沱也凡江

水別出皆名為沱此言東別為沱繼于岷山導江之

下是江始出而別流者則當在梁州詩言江有沱其

荊州之沱歟

澧水

解在荊州

楚辭云遺予佩兮澧浦澧音禮

今澧州澧水在焉澧字从水从豐水隸變作澧豐音禮豆登之屬與豐字不同漢地理志作醴鄭氏以爲陵名即今長沙澧陵非也

九江

解在荊州

九江蓋今洞庭也攷之前志沅

水漸水澠水辰水敘水酉水澧水湘水資水皆合洞庭中東入于江江則過之而已
胡秘監旦晁參政

說之皆以九江為洞庭以巴陵為東陵巴陵在洞庭
東或謂殷盛也言諸水所會其勢壯盛荊州敘次繼
此而後及沱潛雲夢則非江州之下流明矣諸家多
謂九江即今之江州殊不知漢九江郡本在江北今
所謂江州者實武昌之柴桑縣後以江北之尋陽并
柴桑而立九江郡又自江北徙治江南故江南得尋
陽之名後又改為江州實非古九江也蓋尋陽亦作
潯陽水北曰陽潯亦江之一名地在江北故曰尋陽

也案水經九江地在長沙下雋縣西北又案長沙志
潭州長沙郡漢長沙國隸荊州刺史部縣十三第十
下雋至晉省下雋入蒲圻蒲圻今屬鄂州宋元嘉中
割下雋巴陵益以南郡監利州陵置巴陵郡歸蒲圻
于江夏郡湘中記自湘之外所述水凡十五湖嶺之
內湘水貫之凡水皆會焉湘視衆水為大故其脉絡
雖與他水合流而能不雜湘水入江為江所蕩翕而
舉從之矣洞庭之水渚為七百里君山在今巴陵黃

帝所登湘山是也自湘至洞庭其水其溪其江餘五十皆有所自發其餘小水支浦不與焉湘水出于零陵始安縣陽海山過醴陵又東北過漚湘州潭在焉又東北逕潭州城下北逕湘陰縣注于洞庭之湖廣圓五百里中有君山編山又北至巴丘山入于江然則九江實今洞庭而非江州明矣巴陵今岳州漢志雋音字竟反

東陵 水經東陵地在廬江金蘭縣西北江水又東

迤北會于彭蠡澤又曰江水又東左得青林口注云
即水出廬江之東陵鄉江夏有西陵縣故此言東西
南流水積為湖湖西有青林山一說巴陵與夷陵相
為東西夷陵一曰西陵則巴陵為東陵可知凡山之
坡陁可陟者曰陵詩如岡如陵則陵非平地也 顏
師古曰迤溢也東溢分流北會彭蠡說文迤邪行也
中江 水經中江在丹陽蕪湖縣南東至會稽陽羨
縣入于海顏師古曰亦自彭蠡出 蕪東坡曰今金

山少北取中冷水味既殊絕稱之輕重亦異蓋蜀江
所為也丹陽今潤州蕪湖今屬太平州陽羨今常州
宜興江在漢南漢在江北漢折而南入于江乃東而
匯于彭蠡澤漢折而北乃會于匯共入彭蠡澤也不
言會于彭蠡而曰會于匯者蒙上文且明江與漢合
也然後由彭蠡出海為北江江為中江是合而復分
也但言北江中江而不言南江既言同會于匯澤而
實未嘗入彭蠡既分中北二江而今合一而不復分

據今攷古卒不可辨則諸家以南康軍湖為彭蠡蘓氏以廬江為南江以三泠別中北者皆未必得古人所紀之實也

導沅水東流為濟入于河溢為滎東出于陶丘北又東至于潁又東北會于汶又北東入于海

沅水 沅惟沔反亦作澆 水經濟水出河東垣縣王屋山為沅水又東至溫縣西北為濟水注引山海經曰聯水出焉西北流注于秦澤郭璞云聯沅聲相

近即沆水也潛行地下至共山南復出于東丘 春
秋說題辭曰濟齊也齊度也直也漢地理志河東郡
垣縣王屋山在東北沆水所出東南至武德入河軼
出滎陽北地中又東至琅槐入海槐音回

濟水 水經濟水出河東垣縣王屋山為沆東流為
濟東南至河內武德縣入河並流而南截河又並流
溢出乃為滎澤也漢地理志濟作沛顏師古曰泉出
王屋山為沆流去乃為沛沛音姊一云古濟字滎澤

在鄭州

滎水 解在豫州 一云在敖倉東南即成皋縣北也

陶丘 在濟陰定陶縣西南有陶丘亭 爾雅山再成曰陶丘水經注陶丘丘再成也漢志同方十里曰成左傳少康有田一成是也

洧水 水經洧水在山陽湖陵縣南 說文在濟陰定陶縣 水經又曰濟水又東至乘氏縣西分為二

南為潁水北為濟瀆潁水又東入于泗水過彭城縣
北淮水從西來注之 顏師古曰即潁澤也

汶水 解在青州 九域志今襲慶府兗州萊蕪縣
汶水所出其流至密州又至濰州

導淮自桐柏東會于泗沂東入于海

淮水 解在徐州 漢地理志南陽郡平氏縣注禹
貢桐柏大復山在東南淮水所出東南至淮陵入海
過郡四行三千二百四十里

泗水 出濟陰乘氏縣至臨淮睢陵縣入淮沂水先
入泗泗入淮也 水經泗水出魯卞縣北山西南逕
魯縣北又西過瑕丘縣東屈從縣東南流注曰地理
志出濟陰乘氏縣又云出卞縣北經言北山皆為非
矣山海經曰泗水出魯東山下縣東南桃虛俗呼陶
虛有澤澤西際阜俗謂之媯亭山連岡通阜四十餘
里即泗水之源博物志謂泗出陪尾是也 九域志

襲慶府兗州泗水之所出

一云出兗州泗水縣西
至魚臺縣南與荷水合

沂水 解在徐州 水經注沂水出魯城東南尼丘
山西北其末流南過下邳縣西南入于泗 正義曰
地理志云沂水出泰山蓋縣南至下邳入泗

道可渭自鳥鼠同穴東會于澧又東會于涇又東過漆沮
入于河

渭水 水經渭水出隴西首陽縣渭首亭南鳥鼠山
注渭水出首陽縣首陽山渭首亭南谷山在鳥鼠山
西北此縣有高城嶺嶺上有城號渭源城渭水出焉

三川合注東北流逕首陽縣西與別源合水出南鳥鼠山渭水出谷禹貢所謂渭出鳥鼠者也又曰渭水東過長安縣北注云渭水東分為二水廣雅曰水自渭出為滎由河之有澨也此瀆東北流九域志今渭州有渭水屬秦鳳路地理志云隴西首陽西南有鳥鼠同穴山渭水所出至京兆北船司空縣入河過郡四行千八百七十里

澧水 涇水 漆水 沮水 四水並解在雍州

經言東會于澧又東會于涇又東過漆沮入于河此
渭水自西而東之次也雍州所云涇屬渭汭者涇屬
渭北澧屬渭南又曰漆沮既從澧水攸同者散言境
內之水非東會之次也詩云自土沮漆乃幽地非此
漆沮也沮七余反廣韻注云水名出房陵所謂江漢
沮漳楚之望也亦云漆沮既從並在此地與兗州灘
沮不同亦恐非此漆沮之沮也

導洛自熊耳東北會于澗澧又東會于伊又東北入于

河

洛水 水經洛水東逕熊耳山北又東北過盧氏縣
南逕陽渠關北又東逕盧氏縣故城南東與高門水
合洛水又東松楊溪水注之又東庫谷水注之又東
北過蠡城邑之南又東過陽市邑南又東北過于父
邑之南洛水又東逕渠谷又東北過宜陽縣南又東
逕宜陽縣故城南又東北出散關南又東枝瀆左出
焉又東北過河南縣南又東過洛陽縣南伊水從西

來注之又東過偃師縣南又東北過鞏縣東又東北入于河山海經曰洛水至成臯西入河是也漢地理志弘農郡上雒縣注禹貢雒水出冢嶺山東北至鞏縣入河過郡二行七十里熊耳山在縣東北盧氏縣注熊耳山在東郊祀志齊桓公登熊耳山以望江漢師古曰熊耳山在順陽北益陽縣東北禹貢所云導洛自熊耳者也其山兩峰狀若熊耳因以名之漢無順陽益陽縣順陽意即上雒歟

澗水 水經注引山海經曰婁涿山四十里曰白石

之山澗水出焉北流至于穀自下通謂之澗水為穀
水之通稱焉故禹貢曰伊洛瀍澗既入于河而無穀
水之目是名亦通稱矣劉澄之云新安有澗水源出
北縣又有澗水未知其源攷諸地記並無澗水但澗
澗字相近時有字錯為澗也故闕駟地理志曰禹貢
之澗水以是知傳寫果誤也 案漢地理志弘農郡

黽池縣注穀水出穀陽谷東北至穀城入雒新安縣

注禹貢澗水在東南入雒二水異縣各源同入洛則水經謂穀澗通稱未必然也孔安國謂澗水出黽池又新安有一水出通池界流逕新安而入穀與漢志不合亦難攷信

瀍水 一說瀍水出河南地山又云出西京新安縣穀城山案漢地理志河南郡穀城縣注禹貢瀍水出晉亭北東南入雒師古曰即今新安晉音潛弘農郡新安縣注禹貢澗水在東南入雒然則師古所謂今

新安乃唐河南新安縣即漢之穀城縣也漢之新安在弘農郡乃澗水所出非瀍水也

伊水 歐陽文忠公曰伊水出陸渾畧河之南絕山而下東以會河山夾水東西北直國門當雙闕故稱伊闕隋煬帝營宮洛陽登邙山南望曰此豈非龍門邪世因謂之龍門

右凡九州之水曰浮曰達曰入曰沿曰逾曰至曰亂曰匯曰迤曰溢曰流曰別曰道曰被曰會曰過曰同


者以舟而渡則曰浮自此通彼則曰達水自上之下
自小之大則曰入順流而下則曰沿逾言所越也至
言所到也亂言橫流而濟也水勢不可以盡洩則匯
以澤之東匯澤為彭蠡是也水勢不可以徑行則迤
而流之東迤北會于匯是也水勢有所赴而不能容
則縱其溢而舒之溢為滎是也水由地中順理而行
謂之流東流為漢為濟是也同出而枝分謂之別東
別為沱是也橫流之初失其故道今皆復焉而稱曰

道九河既道是也流溢旁覆覃及下流而稱曰被洿
澤被孟豬是也水出異源自彼合此為會東會于泗
沂會于澧于涇之類是已小水合大水大水衡流而
行為過東過洛汭東過漆沮之類是已枝分派別復
合其所歸為同灘沮會同同為逆河之類是已九州
之澤曰豬曰澤者昔焉泛濫于是乎渟滯而不溢故
彭蠡榮波皆曰既豬昔焉漂流于是乎鍾聚而不散
故雷夏曰既澤九州之土昔焉淪沒不可種殖水患

既平其地復治則曰淮沂其乂雲土夢作乂九州之
山祭之而水患平則曰蔡蒙旅平已平而徧祭之則
曰荆岐既旅終南惇物至于鳥鼠非特水患平而已
又可施種植之功則曰蒙羽其藝總叙衆山始隨而
刊之終祭而報之則曰九山刊旅敘百川之濬導則
曰九川滌源敘諸澤之涵浸則曰九澤既陂唐虞史
官紀載之工簡明嚴備昭垂萬代燦若日星後世書
志雖欲效之弗可及已



禹貢指南卷四



總校官庶吉士臣張能照
校對官編修臣楊壽楠
謄錄監生臣王秦雲